

Te Heheuraa Api

E ITE I'A OUTOU I TE PARAU MAU, E NA TE PARAU MAU OUTOU E FAATIAMA

TE VE'A A TE EKALESIA A IESU MESIA I TE FEIA MO'A
I TE MAU MAHANA HOPEA NEI

NENEIHIA I PAPEETE, TAHITI, I TE MAU AVA'E ATOA

Te hoo: E 30 farane i te matahiti.

No 1

-- NOVEMA 1948 --

MAT. 35.

PARAU A'ORAA NA MATAIO

NA roto i to'u taeraa i Tahiti, e te mau fenua nenehe o Oteania Farani nei, i faatiahia'i te hinaaro o to'u aau i faatupu-ê-hia na i reira i to'u tai'oraa matamua i te mau tereraa o Cook i te paeau moana Patitifa nei e to'na taeraa matamua hoi i Tahiti nei, e i te tai'oraa hoi i te mau aamu o te mau Orometua matamua o tei afai mai i te faaroo ia Iesu i teie mau motu nei. Ua tae mai to tatou iho mau Orometua i o nei hoê hanere tiahapa matahiti i mairi a'enei, na roto i te maitiraa e te faaueraa hoi a Iosepha Semita, e no te mea ua poro-haere au i te Evanelia i te tahi atu â mau fenua i te Patitifa nei, ua hinaaro ihoâ vau i te tae mai i o nei, i te vahi matamua i faaithehia'i te îraa o te Evanelia i te Maohi nei.

I to'u taeraa mai i o nei, na roto i to'u tiaraa melo no te mau pupu faatere no te Ekalesia, te afai mai nei au i te here e te haamaitairaa a te Peresiteniraa Matamua, e te here e te faatura raa hoi o te mau Orometua tahito atoa te ora nei, o tei rave i te ohipa i o nei i teie mau matahiti i mairi a'enei. Eita roa e moe i te Orometua o Tahiti nei to'na mau taata i nia i teie mau motu nei, e aita â vau i farerei i te hoê

rahi hoi no teie fare mo'a o te faa-nehenehe-roa i Tahiti nei. Na taua fare pureraa nei e afai i to tatou iho mau taata i mua i te mata o te mau taata atoa, e no reira, e mea tia roa ia tatou atoa ia faa-itoito ia'na iho ra, ia haapao mau i te ho'ho'a no te ora ta te Atua i horoa mai ia tatou. Ia riro ihoâ te ora o te Feia Mo'a ei mea nehenehe, mai te nehenehe o teie fare atoa ra e tia'i, e noa'tu e, aita taua fare ra e tomo-hia e tae noa'tu i te mahana e oti roa'i, e mea tia roa i te Feia Mo'a atoa ia faa-ineine ia ratou no te mau ohipa i mana'ohia no te fare pureraa e hamanihia nei.

Ua mauruuru roa vau i ta te Tavana rahi no Oteania nei, e ta te Tavana oire no Papeete, e te mau feia toroa atoa no te Hau, e no te mau haapaoraa atoa hoi haamaitairaa ia'u, e eita roa e mo'e ia'u. O teie te fenua Farani matamua ta'u i ite e e mea tia roa ia'u ia faaite atu ia outou e, ua faa-rahi hia to'u arue-raa, e to'u here hoi i te Repupirita Farani, e i te aau maru, te au-taeae-raa, e te here hoi o te mau taata Farani ta'u i farerei.

Ua haamaitai-rahi-roa-hia te mau taata o teie mau motu nei i teie tau peapea e te ati rahi hoi i nia i te ao nei, no te mea te ora nei outou i raro a'e i te reva, e te faatereraa hoi o te hoê o te mau Hau rarahi o te ao nei o tei here maitai i te tiamâraa o te taata nei. Te parau atu nei au, i to tatou mau melo no te Ekalesia e, a faaroo maitai i to outou Hau nei e a haapao maitai hoi i te mau ture atoa no te reira. Mai te mea eita outou e na reira te haapao ore nei ia outou i te Hiro'a Faaroo tei na o mai e: *Te faaroo nei matou e, ia aurarohia te mau arii, te mau peresiteni, te mau faatere hau, e te mau haava; ia haapaohia, ia faaturahia e ia faatiahia'tu hoi te mau ture o te fenua.*

Te vaiiho atu nei au i ta'u haamaitairaa i nia ia outou atoa, e te pure atu nei hoi au i te Atua ia amui mai, i nia i-

ho ia outou, te mau haamaitairaa atoa i hinaaro-tia-hia e outou ra. A farii outou i te mau taata o te faatere nei ia outou e a farii mai outou ia outou iho, te tahi i te tahi, ei mau melo mau no te Ekalesia a Iesu Mesia. A haa maru noa outou i to outou mana'o na nia i te mau taata, noa'tu i te huru-ê-raa o to ratou mau mana'o e a faaore outou i te peapea i te mau taata huru paruparu i te faaroo.

E teie nei, te vai nei te faaroo, e te tiaï, e te aroha, e toru ra; o tei hau ra i taua toru nei, o te aroha ia.

Papaihia e: MATAIO TAURI

Peresiteni no te mau Misioni

i te moana Patitifa nei.

E H A A P I I R A A

TE OHIPA E TE HANAHANA O TE ATUA.

E toru tauasini e tiahapa matahiti i mairi a'enei ua faaite maira te Atua ia Mose, na roto i te hoê orama, i te mau ao ta'na i hamani ra. Ua ite ihoâ Mose i teie nei ao, e i te mau taata atoa tei parahi i nia i te reira mai te tau mai â o Adamu e tae roa mai i to tatou tau hopea nei, e ua maere ihoâ oia i te mau ohipa rarahi a te Atua. I to'na aniraa i te Atua ia faaite mai i te tumu i hamani ai Oia i te reira mau mea, ua pahono maira te Atua ia'na, i te na-ô-raa mai e:

Na roto i te parau a to'u mana i hamani ai au ia ratou, oia ia ta'u tamaiti fanau tahi, o tei i hoi i te aroha e te parau mau. Aita e hope ia tai'o te rahiraa o te mau ao ta'u i hamani; e ua hamani atoa varu i taua mau ao ra no ta'u iho opuaraa; e na roto i te Tamaiti i hamani ai au ia ratou, o oia ta'u tamaiti fanau tahi. (Mose 1: 32, 33)

Ua faaoti mai ra te Atua i ta'na parau faaite ia Mose i te hoê parau faufaa rahi no nia i te ohipa e te hanahana o te Atua. Na ô maira Oia:

Inaha ra, o teie ta'u ohipa e to'u hanahana hoi - - ia faa-tupu i te tahuti ore e te ora mure ore o te taata nei. (Mose 1:39)

Te vai ra te tahi parau faufaa rahi tei faaitehia mai i te Peropheta ra ia Iosepha Semita na roto i te heheuraa. Na ô maira taua parau ra e:

Te hanahana o te Atua ra, o te ite ia, oia hoi, te maramarama e te parau mau. (Buka Fafau 93:36)

Te haa-maramarama mai nei teie na heheuraa e piti ia tatou no nia i te huru no te ohipa a te Toru-tahi - - Te Metua, te Tamaiti e te Varua Maitai, no te mea, hoê â ihoâ ratou i roto i te ohipa.

Na teie na irava i papaihia i nia nei i haa papu ia tatou e, e mea na roto i ta te Atua ohipa i noaa'i ia'na te rahiraa o to'na hanahana. Ua tamau roa Oia i te mau haapiiraa no nia i te mau ture mure ore o te parau mau, e na roto i to'na faatereraa i taua mau ture ra mai te au i to'na hinaaro, ua hamani oia i te mau ao ei parahiraa no ta'na mau tamarii. E na roto hoi i te mana o te Autahu'araa mo'a ra i hamani ai Oia, te Metua mure ore, i te mau ao e i faaoti ai hoi i ta'na mau opuaraa mo'a ra.

No te mea e ite hope e e mana hope to te Atua, te mau faaueraa e te mau haapiiraa ta'na i horoa mai, ia tatou nei, o te mau mea maitai a'e ia te tia ia horoahia mai. Ia haapao hia teie mau faaueraa maitai a te Atua, e faatupu mai te reira i te mau haamaitairaa rahi ia tatou. Te parau nei hoi tatou i taua mau faaueraa ra i te i'oa, te Evanelia a Iesu Mesia. E hoho'a te reira i papaihia mai, e te Atua, no te faa-tupu-raa i te maitai i roto i te taata nei, e ia ravehia ta tatou mau ohipa mai te au i taua hoho'a ra, e ite ia tatou i te faufaa no te reira.

E here hope atoa to te Atua, no reira, te hinaaro nei Oia i te maitai no ta'na mau tamarii paatoa. E faa-rahi-hia to'na hanahana, to'na mana e to'na oaoa na roto i te faaho'i raa i ta'na mau tamarii i mua i to'na aro, ia faatupuhia to ratou iho oaoa, to ratou iho mana e to ratou iho hanahana. E faa-rahi-noa-hia te hanahana o te Atua na roto i to'na tau-tururaa i ta'na mau tamarii ia riro mai ia'na te huru, no reira o teie ta'na ohipa rahi - - *ia faatupu i te tahuti ore e te ora mure ore o te taata nei.*

TE TAHUTI ORE E TE ORA MURE ORE.

E mea ê te TAHUTI ORE i te ORA MURE ORE tei parauhia mai i roto i te irava. E mau taata tahuti ana'e tatou paatoa nei no te mea e pohe tatou e hope roa'e. Tera râ tei roto ia tatou atoa nei te hoê varua pohe ore, no te mea eita roa te reira e pohe. No reira e mea tahuti ore to tatou mau varua. I roto i te opuaraa mo'a no te faa-ora-raa i te taata nei, o tei faa-tumu-hia na mua a'e i te taeraa mai o te taata i nia i te ao nei, ua faa-taa-hia te hoê ravea no te faa-tupu-raa i i te tia-faahou-raa o te tino tahuti, e te amui-faahou-raa i te reira i te varua.

Te parau ra te Atua no nia i te tia-faahou-raa i te taima i faaite mai ai Oia ia Mose e, o te faa-tupu-raa i te *tahuti ore o te taata nei*, o ta'na ia ohipa no te mea hoê â te auraa o te parau *tahuti ore* e te parau *tia-faahou-raa*. Ua taa maitai te reira haapiiraa i te mau Peropheta no te mau tau tahito ra. Ua na ô maira o Amuleka:

Te parau atu nei au ia outou e, e raatiahia teie tino pohe nei mai te pohe maira ei tino pohe ore, oia hoi, mai te pohe matamua i te ora, ia ore ratou e pohe faahou; e tuatihia to ratou varua i to ratou tino, e e ore e faataa-ê-faahou-hia; e ua riro te reira ei mea varua, e ei mea pohe-ore, ia ore ratou e ite faahou i te mea tahuti noa ra. (Alama 11:45)

Te tia-faahou-raa, oia hoi, te faatupu-raa i te tahuti ore o te taata nei, ua faaotihia te reira na roto i te taraehara a Iesu Mesia. E noaa i te mau taata atoa i nia i te ao nei, noa'tu i te huru o to ratou haapaoraa, taua horoaraa rahi ra a te Mesia ra, oia hoi, e tia-faahou-mai ratou mai te pohe maira, e eita roa ratou e pohe faahou e a muri noa'tu. Ua matara te fifi o te pohe i te Faaora, na roto i ta'na taraehara, e ua haamau-roa-hia te ture no te tia-faahou-raa. I muri mai i te *tia-faahou-raa* eita roa te taata e pohe faahou i te poheraa tino nei. Te reira ihoa ia te *tahuti-ore* i faatupuhia mai e te Atua.

Ua na ô maira o Iosepha F. Semita i roto i te hoê o ta'na mau buka: *O te tahuti-ore ra, e horoaraa ia na te Atua, na roto ia Iesu Mesia, i te mau taata atoa; na roto i te reira e tia mai ai ratou i roto i te tia-faahou-raa, e eita ratou e pohe faahou, noa'tu e ua haapao maitai ratou i ta'na mau faaueraa, e a ore râ, ua haapao ore. Na ratou iho teie horoaraa rahi; e farii atoa te parau-tia-ore i te reira, na roto i te aroha o Iesu Mesia, e e ora noa ratou e a muri noa'tu. Tera râ, ia aufau ratou i ta ratou tarahu no ta ratou mau hara e tia'i, na roto i te mau ihi rahi i pihaiho i te Diabolo hou ratou e faa-orahia'i.*

Area râ, te *ora-mure-ore* ra, o te hoê ia haamaitairaa rahi na te Atua, te roaa i te tahi mau taata parau-tia roa, no to ratou haapao-maitai-raa i te Evanelia a Iesu Mesia ra. Eita roa te reira e horoa-noa-hia, i te mau taata atoa, mai te *tahuti-ore* te huru. E mea na roto râ i te ohipa maitai a te taata te roaa ra te *ora-mure-ore*.

Ua na ô maira te parau a te Fatu, i ta'na mau tamarii: *Mai te mea e haapao maitai outou i ta'u mau faaueraa, e tae noa'tu i te hopea ra, e noaa ia ia outou te ora-mure-ore, o te horoaraa ia tei hau roa'tu i te rahi i te mau horoaraa atoa a te Atua. (Buka Fafau 14: 7)*

I te tahi taime ua parau maira te Atua, ia Iosepha Semita, e na roto i ta'na parau i haa-papu-hia'i te taa-ê-maitai-raa o te parau TAHUTI-ORE i te parau ORA-MURE-ORE. Na ô maira Oia e: *E ua na reira vau, te Fatu ra o te Atua, i te faataaraa i te taata nei te rahiraa o to'na pue mahana i nia i te ao nei - - ia noaa ia'na, na roto i te poheraa o te tino nei, te tia-faahou-raa i te ora tahuti ore, e tae noa'tu i te ora mure ore, o ratou atoa ia o tei faaroo mai; e o ratou o te ore e faaroo i te faahaparaa mure-ore; na te mea aita e tia ia faaorahia ratou i to ratou hi'araa varua, no te mea aita ratou i tatarahapa. (Buka Fafau 29: 43, 44)*

Eaha te auraa o te parau ORA-MURE-ORE? Ua na ô maira te Evanelia a Ioane e: *Teie hoi te ora mure-ore, ia ite ratou ia oe i te Atua mau ra, e ia Iesu i te Mesia i ta oe i tono mai. (Ioane 17: 3)*

Ia ite tatou i te Atua e mea tia ia ite tatou i te huru o te here, te aroha, te faaoreraa i te hara a vetahi ê ra, te parau-tia, te ite, te viivii-ore e te mau maitai atoa te vai ra i roto i te Atua. Ia titau râ tatou i te ora mure ore, e mea tia ia faariro tatou ia tatou iho mai te Atua te huru, na roto i to tatou haapao-maitai-raa i ta'na mau ture e ta'na mau faaueraa.

Ua na ô maira to tatou Faaora: *Te apiapi ra o te uputa e te piri hoi o te e'a e tae atu ai i te ora, e te iti hoi o te feia i ite atu i te reira. (Mataio 7: 14)* Te parau ra hoi Oia no te feia o te ite atu i te ora mure ore. E mea piriha'o ihoa te uputa, e e mea piri hoi te e'a e tae atu ai i te ora mure ore. No reira, e feia parau-tia ana'e o te ite atu i te ora mure ore.

Te ora mure ore ra, o te huru ora ia tei noaa i te Atua, e i ta'na tamaiti fanau tahi. No reira, te mau taata atoa te noaa ia ratou te ora mure ore, e parahi ratou i te vahi o te Atua ra, tei reira hoi te Atua e ta'na Tamaiti o Iesu Mesia i te faaearaa. I roto i te hoê heheuraa, i te mau melo no te Ekalesia, ua na ô maira te Fatu e: "Mai te mea e rave noa outou i te maitai, oia ia, ma te haapao maitai i te faaroo e tae noa'tu i te hopea, e faaorahia ia outou i roto i te Basileia o te Atua, o te horoaraa rahi roa ia na

te Atua, no te mea, aita'tu e horoaraa tei hau atu i te horoaraa no te ora (mure ore). (Buka Fafau 6: 13)

E itehia te tumu no te ora na roto i te parau a te Peroppheta ra o Lehi; ua na ô maira oia e, *Ua hi'a Adamu ia vai te mau taata, e te vai nei te mau taata ia noaa to ratou oaoa.* (*II Nephi 2: 25*)

E itehia te oaoa rahi, e te poupou, e te oraraa tei hau atu i te maitai, i roto i te Basileia Tiretiera o te Atua, tei reira hoi te Atua. Ua na reira maira te Atua, i to'na faaite-raa ia Enoha e, ua horoa Oia i te Evanelia i te taata nei ia Oaoa ratou i te mau parau no te ora mure ore i nia i te ao nei, e ia noaa ia ratou te ora mure ore i te ao a muri atu, oia ia, te hanahana mure ore. (Mose 6: 59)

Ia haapoto-noa-hia te parau haapiiraa, o te TAHUTI ORE ra, o te oraraa ia e a muri noa'tu. Eita roa te tino e pohe faahou. Te TAHUTI ORE i horoahia mai i te mau taata atoa nei e hope roa'e, o te TIA-FAAHOU-RAA ia. E faatia-faahou tatou, tataihoê, i to tatou iho mau tino pohe, e e amui-faahou-hia'tu te reira i te varua, eiaha ia taa-ê-faahou, e a ore râ, ia faaore-faahou-hia. Area râ, te ORA MURE ORE ra, o te huru oraraa ia e roaa i te mau taata parau-tia ana'e i roto i te Basileia matamua o te Atua. O te huru ora ia tei noaa i te Atua e ta'na Tamaiti o Iesu Mesia. No reira e parahi te mau taata tei noaa taua huru ora ra, oia hoi, te ORA MURE ORE, i pihaiho i te Atua ra.

Te mau uiraa: Eaha te tumu i hamani ai te Atua i te ao nei? E mea nahea to te Atua hamaniraa i teie nei ao? A faaite mai na i te tahi mau mea tei haa-papu mai e, e mea hamanihia teie nei ao e te Atua? Eaha te ohipa rahi a te Atua? Nahea e faa-rahi-hia'i te hanahana o te Atua? Eaha te auraa o te parau TAHUTI ORE? Eaha te auraa o te parau OKA MURE ORE? Eaha te vahi huru ê i rotopu i te TAHUTI ORE e te ORA MURE ORE? A faaite mai na e, e mea nahea i riro ai te TAHUTI ORE ei horoaraa na te Atua i te mau taata atoa nei? Eaha te tumu no te ora? Eaha te tumu i horoa mai ai te Atua i ta'na Evanelia i te taata nei?

Faa auhia e RE Orometua

No roto mai i te buka " Te Evanelia i te mau Tau atoa "

E PARAU FAAITE NA TE PERESITENIRAA MISIONI

O teie ta tatou ve'a apî. Ua riro te reira ei mea apî ia tatou no te mea ua maoro i teie nei, aita te reira i neneihia. E ere râ ta tatou ve'a, TE HEHEURAA APÎ, i te mea apî. Ua haamata-ê-hia na te reira, e te mau Orometua tahito e ua nenei-noa-hia te reira e tae roa mai i teie tama'i hopea nei, e mai reira mai â aita i nenei-faahou-hia no te mea ua ho'i atu te mau Orometua papaa i Marite, no te haereraa i roto i te faehau. I teie nei râ, te oaoa nei tatou atoa no te mea te nenei-faahou-hia nei ta tatou ve'a, TE HEHEURAA APÎ.

Te ani atu nei matou, i te mau melo no te Ekalesia e i to tatou mau hoa no rapae, ia haponu mai i te parau hooraa ve'a, te itehia i roto i teie nei ve'a, i te Fare Orometua i Papeete nei mai te mea e hinaaro outou i te hoo mai i ta tatou ve'a apî i roto i te mau matahiti i mua nei.

Te aroha'tu nei matou ia outou paatoa, e te titau nei hoi matou ia outou ia haapao maitai i te mau faaueraa a te Atua, ia noaa ia outou te mau haamaitairaa i faataahia, e te Atua, no te haapao-maitai-raa i te reira mau faaueraa.

Papaihia'tu e te Peresiteniraa Misioni

E. Bentley Mitchell Jr. (*Mitiela*)

Ray T. Wilcox (*Re*)

George E. Magnusson (*Tihoti*)

EDITORIAL

TE TAHI NA ITE TOOVAU.

Ua mâtau roa tatou i te parau i papaihia i te pae i mua o te Buka a Moromona, oia hoi, te PARAU FAAITE A NA ITE TOOVAU. Ua faaite papu roa ratou e, ua ite mata e ua fafa hoi ratou i te mau apî veo ta te melahi ra o Moroni i horoa ia Iosepha Semita, i te haamataraa o te tau hopea nei, e no reira ua riro ihoâ ratou ei ite no taua ohipa ra.

Ta vai atura te tahi na ite toovau tei faaite papu mai i ta ratou parau faaite i to te ao nei. Aita râ tatou i mâtau roa i ta ratou parau faaite. O teie na ite toovau ra, o te mau Peropheta ia no teie tau hopea nei, mai te Peropheta ra o Io-

sepha Semita e tae roa mai i to tatou Peropheta nei o Tihoti Arapera Semita. Na roto i te heheuraa a te Varua Maitai, ia ratou i noaa'i ia ratou te ite-papu-raa e, o Iesu Mesia ra, o te Tamaiti mau ia a te Atua ora, e ua faa-satauro-hia Oia no te mau hara a to te ao nei. Ua papu atoa ia ratou e, te ohipa ta tatou e rave nei, o te ohipa mau ihoâ ia a te Fatu. E riro ta ratou parau faaite ei faufaa na tatou, no te mea, na roto i te reira e ite ai tatou e, ua faa-ho'i-hia mai te îraa o te Evanelia mure ore i nia i te ao nei, e te vai nei te mau tavi-ri no te faa-ora-raa i te taata i roto i te rima o to tatou Peropheta.

O teie ta ratou parau faaite:

Iosepha Semita: Ua ite papu roa vau i te hoê maramarama, e ua ite hoi au i na taata toopiti i roto i taua maramarama ra, e ua parau ihoâ mai raua ia'u, e noa'tu e ua inoinohia vau e ua hamani-ino-hia hoi, no to'u faaaiteraa'-tu e ua ite mau vau i te hoê orama, noa'tu hoi i te reira, e parau mau ihoâ ia.

Birikama Youne: Te faaite papu atu nei au e, te vai mau nei te Atua, e te ora mau nei Iesu Mesia, e o Oia ihoâ te Faaora no te ao nei. Ua ite hoi au e, e Peropheta mau o Iosepha Semita na te Atua, e ua farii ihoâ oia i te mau heheuraa apî e rave rahi.

Ioane Tela: Te faaite papu atu nei au, mai ta to'u mau taeae i faaite ra, o teie mau te ohipa a te Atua i heheuhia mai e te Mana hope, e ua ite papu roa vau i te reira.

Virifora Vuturufa: Te hinaaro nei au i te faaite-papu-atu i te parau mau no teie nei ohipa, e ohipa mau ihoâ ia na te Atua. Ua faataa-hia-hoi Iosepha Semita, e te Fatu, hou oia i fanauhia mai ai i te tino nei.

Loreneto Seno: Te faaite papu atu nei au, i mua i te aro o teie nei amui-raa e, na te Atua mana hope, na roto i ta'u haapao-maitai-raa i te Evanelia a Iesu, i heheu mai ia'u, ma te ite-papu-hia e au e, o teie te ohipa mau a te Atua, o teie hoi ta'na Evanelia.

Iosepha F. Semita: Ahiri aita te hoê taata i faaite papu i teie mau mea i nia i te ao nei, e vai noa ia te hinaaro i roto ia'u ia faaite papu e, ua farii au i te faaiteraa, na te Varua, i roto i to'u iho aau. Te faaite atu nei au, i mua i te Atua e i te mau melahi, e i te mau taata atoa hoi, ma te mata'u ore i te utu'a no ta'u mau parau, ua ite papu roa vau e te ora mau nei to'u Faaora e e ite mata mau â vau Ia'na, e e tia faahou â vau i pihai iho Ia'na, i nia i teie nei ao, mai te mea e haapao-maitai-noa vau, no te mea na te Atua i heheu mai i te reira ia'u.

Hebera Garanata: Ua riro ia ei oaoa-raa mau no to'u ora-raa, no te ite tei noaa ia'u no te ohipa mo'a a te Faaora, ia faaite-papu-atu i to'u iteraa i te reira, e ia faa-teitei i to'u reo ma te parau raa'tu e, ua parau faahou-ihoâ-mai te Metua, no roto mai i te ra'i ra, e na te Atua i faaite mai i ta'na Tamaiti here ia Iosepha Semita, e na'na hoi i faaue mai ia'na ia faaroo mai i ta'na Tamaiti, e ua faaite maira te Faaora, ia Iosepha Semita e, e riro oia ei mauhaa, i roto i te rima o te Atua, no te faatia-faahou-raa i te Ekalesia a Iesu Mesia i nia i te ao nei.

Tihoti Arapera Semita: Te faaite papu nei au ia outou na e, o teie mau te ohipa a to tatou Metua, e e tere noa te reira i mua e tae noa'tu i to Iesu tae-faahou-raa-mai i roto i te mau ata o te reva, o Oia ia te tia ia faatere mai i teie nei ao ei Arii no te reira.

Aita hoi te Atua e hi'o i te huru o te taata. E noaa i te mau taata o tei haapao i te ture no te iteraa i te reira mau mea, taua ite ra no'na iho no te mea, *na roto i te mana o te Varua Maitai e ite ai outou i te parau mau no te mau mea atoa ra. (Moroni 10:5)*

TE BUKA A MOROMONA

Eaha te Buka a Moromona.

Te Buka a Moromona, o te parau tuatapapa ia o te mau nunaa tei ora i nia i te fenua America, mai te tau tahito mai â e tae roa mai i te matahiti 400 i muri a'e i te Mesia. Ua neneihia te reira buka i te matahiti 1830, hou a haa maramarama'i te mau imiraa a te feia paari i te parau tuatapapa no America tahito ra.

Te faaite mai nei te Buka a Moromona i te mau haereraa e te mau tama'i o taua mau nunaa ra, te parau no to ratou faaroo e ta ratou mau peu haamoriraa. Te faaite mai nei oia i te hanahana e te mairiraa o te mau nunaa, e te mau mana tei faatia e o tei haamou i te taata nei. Te faaite atoa maira oia i te parau nehenehe roa no te taeraa o Iesu Mesia i TA'NA NANA i nia i te fenua America. E buka faahiahia mau taua buka ra o tei paturu i te mau haapiiraa o te Bibilia e tei horoa i te hoê tiatonuraa i to te ao nei.

Te vahi no reira mai oia.

Ua iritihia mai te Buka a Moromona e Iosepha Semita, te hoê tamaiti tei ore i ite i te mau mea atoa o te ao nei. Ua heheu mai te hoê ve'a no te ra'i mai, o Moroni to'na i'oa, te vai ra te tahi mau apî auro, tei ootihia i nia iho te parau tuatapapa o te mau taata matamua tei parahi i America, i roto i te hoê aivi tei vai i te tooa o te râ o te tufaa fenua Niu-Yoka, tei paraubia i teie nei te aivi Cumora. Ua papaihia te reira mau parau i roto i te reo "Aiphiti i faa-apî-hia" i nia i te mau apî, e aita roa taua tamaiti ra i ite i te reira reo; area râ, ua tia ia'na ia iriti mai i te reira na roto i te tahi mau ravea tei horoahia mai ia'na e taua ve'a ra no te ra'i mai.

Te mau Ite.

Ua horoa mai na taata e hoê ahuru ma hoê, i roto i na pupu e piti, e toru taata i te tahi e e vau taata i te tahi, i te hoê parau faaite tei papaihia mai teie te huru, ua ite mata ratou e ua fafa atoa hoi ratou i te mau apî auro no reira te iritiraahia mai te Buka a Moromona. E mau taata maitai, te tura e te ma'i ore hoi ratou. Aita ratou atoa i vai noa ei mau pîpî na Iosepha Semita, aita râ te hoê o ratou i huna i ta ratou mau faaiteraa no nia i taua mau apî ra. Aita te hoê o ratou i vaiho noa mai i te hoê maa parau faafeaa mai e, ua haavare-paha-hia ratou. Ua ora ratou e tae noa'tu i to ratou poheraa ma te tapea maite i ta ratou faaiteraa, oia hoi, ua iritihia te Buka a Moromona no nia mai i te mau apî auro ta ratou i ite ra.

Faaauhia e Marcel Bonnet.



TE HAERE NEI TE EKALESIA I MUA

To Tatou Aposetolo.

I teie mau ava'e i mairi a'enei ua tae mai to tatou Aposetolo, o Mataio Tauri, i te Misioni Tahiti nei. E melo oia no te Tino Ahuru ma piti, e ua maitihia oia ei Peresiteni no te mau Misioni o te Ekalesia, i teie paeau Patitifa nei. No reira ua riro to'na tere-haere-raa i te mau Misioni i raro a'e i to'na faatereraa ei ohipa tumu na'na. E ho'i faahou mai ihoâ oia, i Tahiti nei, i teie mau matahiti i mua nei.

I to Mataio faaeearaa i te Misioni nei ua tere atu oia i Tubuai, Raivavae, Huahine, Raiatea, Borabora, Maupihaa e i Moorea atoa hoi. Te opua ra hoi oia i te tere atu i te tahi mau fenua Tuamotu, no te farereiraa i te mau Amaa i reira, aita râ i navai to'na taime, i te Misioni, no te faa-oti-raa i taua tere ra. Ua haapotohia to'na faaeearaa, i rotopu ia tatou nei, na roto i te tauraa a te Peresiteniraa Matamua ia haere oia i te tahi mau vahi no te faa-otiraa i te tahi ohipa i mana'ohia e ratou.

Ua mauruuru roa râ tatou no te mea ua tae mai to tatou Aposetolo i teie Misioni nei, e ua mauruuru atoa tatou no te mau ohipa i faaotihia e i faatupu-hia-boi e ana ra, i to'na faaeearaa i rotopu ia tatou. E piti ava'e te maoro o to'na faaeearaa i te Misioni nei, mai te 28 no Tiunu e tae roa mai i te 23 no Atete. *Ia ora na e Mataio i to oe haereraa.*

To Tatou Fare Pureraa Apî.

Te tere nei te mau ohipa no te faatiaraa i to tatou Fare Pureraa apî i mua, e te mauruuru nei e te oaoa nei hoi tatou no te reira. Ua oti roa te niu o te fare pureraa e te fare orometua, e i teie nei te faatiahia nei te tino fare o te fare orometua. E mea patuhia i te biriti tima. E mea apî e te faahiahia hoi te mau hamaniraa.

I nia i te vahi i faataahia no te fare pureraa apî e hamanihia'i te hoê piha rahi no te mau pureraa, te hoê piha no te Autahu'araa e te Paraimere, te hoê piha no te Pupu o te Mau Tuahine, te hoê piha ohipa na te Peresiteniraa Amaa, te hoê piha faa-ineine-raa oro'a na te mau Diakono, te hoê piha hopuraa pape na te mau tane, te hoê piha hopuraa pape na te mau vahine e te tahi mau piha taa-ê no te mau pupu i roto i te Haapiiraa Sabati. I muri mai i te Fare Pureraa e hamanihia'i te vahi baptizoraa. E faa-nehe-nehe-roa-hia te reira vahi i te mau huru tiare e ati noa'e te bassin. Ia oti teie fare pureraa apî e hau atu te reira i te nehenehe i te mau fare pureraa a te Ekalesia, i teie paeau, maori râ, te Hiero i Vaihi.

Te Oro'a haamauraa Ofai Tihi.

I te 14 no Atete i mairi a'enei ua haamauhia te ofai tihi no to tatou fare pureraa apî, i Papeete nei, e to tatou Aposetolo o Mataio Tauri. Ua haapaohia te hoê pureraa, i nia i te niu o te fare pureraa apî, i raro a'e i te aratairaa a Mitiela Peresiteni, i te hora iva i te po'ipo'i. I roto i taua pureraa ra ua a'o mai te Peresiteni no te Amaa i Papeete, o Raituia â Tapu, i te tahi mau parau maitai i roto i te reo Farani. I muri a'e i te reira ua a'o mai o Farani Fumela i te tahi mau parau na roto i te reo Tahiti. O oia te taata i tonohia mai, e te Peresiteniraa Matamua, ei faatere no te mau ohipa i nia i te fenua apî. Ua faaite maira oia i to'na here i te taata maohi. O te maha

teie o to Farani taeraa mai, i teie paeau moana nei, no te ohipa a te Ekalesia, no reira ua mâtau roa oia i te mau taata o teie paeau nei. Hou te ofai tihi i tamau-roa-hia'i ua faaite maira Mataio i to'na mau mana'o maitatai, e ua faa-itoito hoi oia, ia tatou, ia haapao i te mau ture a te Hau Repupiritā Farani nei e tae noa'tu i te mau ture a te Ekalesia. Ua na ô maira oia, e mea tia roa, ia tatou, ia here te tahi i te tahi, noa'tu i te huru o te haapao-raa o te taata. Eiaha roa'tu te hoê melo no te Ekalesia ia inoino atu i te tahi taata no rapae i te Ekalesia no te mea e ere oia i te melo no ta tatou Ekalesia. I te taime i faaoti ai Mataio i ta'na a'oraa ua haamau atura oia i te ofai tihi ra.

Tei roto i taua ofai tihi ra te hoê afata vea. Ua tuuhia te tahi mau buka, mai te Bibilia e te Buka a Moromona, i roto i te reira. Ua tuu-atoa-hia te hoê parau tuatapaparaa, no te Misioni Tahiti nei, mai te matahiti 1844, te taime i tae mai ai to tatou mau orometua matamua i Tubuai, e tae roa mai i teie nei matahiti, e te hoê tapura tei faaite i te i'oa o te mau Orometua papaa tei tae mai i teie paeau moana nei, te matahiti ratou i tae mai ai e te matahiti hoi ratou i reva'tu ai.

Ua ootihia te ofai tihi no roto mai i te vahi no reira mai te mau ofai no te Hiero rahi i Roto Miti. I nia iho i te reira ua ootihia te matahiti ra '1948' ei haa-mana'o-raa i te matahiti i haamata hia'i te mau ohipa no te faatia-raa i te fare apî.

I muri a'e i te oro'a haa-mau-raa ofai ua faatupuhia te hoê ta-maa-raa Tahiti, no te mau melo o te Ekalesia e to tatou mau hoa no rapae i te Ekalesia. Ua faa-ineine-maitai-hia te mau maa e te Pupu Tuahine no te Amaa i Papeete. Aita roa te reira i pau i te amu hia i te ta-maa-raa.

Te mana'ohia nei e ua hau atu i te hoê tauasani te rahiraa o te mau taata tei putuputu mai no te oro'a haamauraa ofai tihi. Ua tae mai hoi te Tavana oire no Papeete e te tahi mau taata faatere no te Hau nei. Ua tae atoa mai te tahi mau faatere, no te tahi mau Ekalesia, no te mataitai raa i ta tatou ohipa e ua mauruuru hoi tatou no te reira.

Te Peresiteniraa Misioni.

I te 15 no Atete i mairi a'e nei ua faa-taa-hia o Re Orometua ei Tauturu hoê e o Tihoti Orometua ei Tauturu Piti, no Mitiela Peresiteni, i roto i te Peresiteniraa Matamua no te Misioni Tahiti nei. Na Mataio Tauri i faataa ia raua i roto i te hoê pureraa, no te mau Orometua, tei haapaohia i roto i te Fare Orometua i taua Sabati ra.

Marcel BONNET Gérant et Imprimeur, Papeete, Tahiti.
